



საქართველოს სტატისტიკის ეროვნული სამსახური

სასოფლო მეურნეობათა გამოკვლევის

ინსტრუქცია

დამტკიცებულია სსიპ „საქსტატი“-ს საბჭოს 2013 წლის 21 ივნისის № 8 დადგენილებით

თბილისი 2013

სასოფლო მეურნეობათა გამოკვლევის ინსტრუქცია

პერიოდულობა:

გამოკვლევის 1 რაუნდი მოიცავს 1 საწყის, 3 კვარტალურ და 1 დასკვნით გამოკითხვას.

ინსტრუმენტარი:

- სასოფლო მეურნეობათა გამოკვლევა (საწყისი კითხვარი);
- სასოფლო მეურნეობათა გამოკვლევა (კვარტალური კითხვარი);
- სასოფლო მეურნეობათა გამოკვლევა (დასკვნითი კითხვარი);
- არასრული ინტერვიუების სარეგისტრაციო ფურცელი.

გამოკვლევის მიზანი და მისი ჩატარების მნიშვნელობა:

გამოკვლევის მიზანია სოფლის მეურნეობის ძირითადი მაჩვენებლების გაანგარიშება ქვეყნისა და რეგიონების დონეზე. გამოკვლევით ხორციელდება საქართველოში არსებული სასოფლო მეურნეობების შესახებ სხვადასხვა მონაცემების შეგროვება და დამუშავება, კერძოდ:

- ა) ერთწლიანი კულტურების ნათესი და აღებული ფართობები, მოსავალი და მოსავლიანობა, მრავალწლოვანი ნარგავების ფართობი, ძირთა რაოდენობა და მოსავალი;
- ბ) სასოფლო-სამეურნეო კულტურების მორწყვა;
- გ) პირუტყვისა და ფრინველის სულადობა და მეცხოველეობის პროდუქციის წარმოება;
- დ) სასუქების, პესტიციდებისა და ნაკელის გამოყენება;
- ე) სასოფლო-სამეურნეო ტექნიკისა და მოწყობილობების გამოყენება;
- ვ) სარგებლობაში არსებული სასოფლო-სამეურნეო შენობა-ნაგებობები;
- ზ) სასოფლო-სამეურნეო პროდუქციის გამოყენება;
- თ) შემოსავლები სასოფლო-სამეურნეო წარმოებიდან და წარმოებაზე გაწეული დანახარჯები;
- ი) ინფორმაცია სასოფლო-სამეურნეო კრედიტების შესახებ.

გამოკვლევის შედეგები (ძირითადი პროდუქტები):

გამოკვლევის შედეგად მიიღება სოფლის მეურნეობის ძირითადი მაჩვენებლები ქვეყნის დონეზე და რეგიონების მიხედვით: ერთწლიანი კულტურების ნათესი და აღებული ფართობები, წარმოება და საშუალო მოსავლიანობა; მრავალწლოვანი კულტურების წარმოება; პირუტყვისა და ფრინველის სულადობა; მეცხოველეობის პროდუქციის წარმოება; ფურისა და ფურკამეჩის საშუალო წველადობა; პირუტყვის ნამატი; პირუტყვის და ფრინველის დაცემა; სასოფლო-სამეურნეო პროდუქტების ფასები (ფასები ფერმის კართან).

შედეგების გამოქვეყნების ვადები:

შედეგების გამოქვეყნება ხორციელდება სტატისტიკურ სამუშაოთა კალენდარის შესაბამისად.

გამოკვლევის მეთოდი და შერჩევის ზომა:

სასოფლო მეურნეობათა გამოკვლევის შერჩევის ბაზის ძირითად წყაროს წარმოადგენს 2014 წლის სასოფლო-სამეურნეო აღწერა. გამოკვლევის ხუთივე გამოკითხვისას გამოიკითხება ერთი და იგივე სასოფლო მეურნეობები (დაახლოებით 12 000 მეურნეობა), რომლებიც ორსაფეხურიანი, სტრატეგიცირებული, კლასტერული, შემთხვევითი შერჩევის გზით შეირჩევიან საქართველოში არსებული დაახლოებით 642 000 სასოფლო მეურნეობიდან. პირველ საფეხურზე ხდება კლასტერების (დასახლებების) შერჩევა, ხოლო მეორე საფეხურზე შერჩეულ კლასტერებში - მეურნეობების შერჩევა. გამოკვლევა მოიცავს საქართველოს მთელ ტერიტორიას, ოკუპირებული აფხაზეთის ავტონომიური რესპუბლიკისა და ცხინვალის რეგიონის გარდა. ყოველ წელს ხორციელდება ახალი შერჩევის ფორმირება, რომელიც ეფუძნება როტაციულ დიზაინს, კერძოდ წინა წელს შერჩეული 12 000 მეურნეობიდან იცვლება დაახლოებით 4 000 მეურნეობა. შერჩევაში მოხვედრილი მეურნეობები გამოკვლევაში მონაწილეობენ 3 წლის განმავლობაში. ამასთან, მსხვილი სასოფლო მეურნეობები ყოველი წლის შერჩევაში სრულად არიან წარმოდგენილნი.

გამოკვლევის ობიექტი:

გამოკვლევის ობიექტია **სასოფლო მეურნეობა (მოკლედ, მეურნეობა)** – დამოუკიდებელი ეკონომიკური ერთეული ზომის, საკუთრებისა და სამართლებრივი ფორმის მიუხედავად, რომელშიც სასოფლო-სამეურნეო წარმოება ხორციელდება მეურნის (შინამეურნეობის შემთხვევაში შინამეურნეობის წევრი, ხოლო საწარმოს შემთხვევაში საწარმოს დირექტორი ან უფლებამოსილი პირი) ხელმძღვანელობით, რომელიც პასუხისმგებელია სამეურნეო გადაწყვეტილებებზე და საკუთარ თავზე იღებს მეურნეობის გაძლოლასთან დაკავშირებულ ყველა ეკონომიკურ რისკს და დანახარჯს, ამასთან, სარგებლობს სამეურნეო საქმიანობის შედეგებით.

სასოფლო მეურნეობის არსებობისათვის აუცილებელი ატრიბუტებია: სარგებლობაში არსებული **სასოფლო-სამეურნეო მიწა** (საკუთარი ან იჯარით აღებული), რომელზეც მიმდინარეობს სასოფლო-სამეურნეო წარმოება ან/და **პირუტყვი, ფრინველი ან ფუტკრის ოჯახი**

(საკუთარი ან იჯარით აღებული), რომელიც გამოიყენება სასოფლო-სამეურნეო პროდუქციის მისაღებად.

უნდა აღინიშნოს, რომ არსებობს ე.წ. უმიწო მეურნეობები. ასეთი მეურნეობების მაგალითებია: საინკუბატორო მეურნეობები; მეურნეობები, რომლებიც ეწევიან მხოლოდ მეცხოველეობას (მაგალითად, მეფუტკრეობას) საზოგადო სარგებლობის მიწაზე; მრავალსართულიან სახლში მცხოვრები შინამეურნეობა, რომელსაც პირუტყვის ან ფრინველის სადგომი აქვს საერთო ეზოში; მეურნეობა, რომელიც არ ფლობს საკუთრების ან საიჯარო უფლებას სასოფლო-სამეურნეო მიწაზე, მაგრამ გააჩნია ცალკე მდგომი ძირები და ა.შ.

სასოფლო მეურნეობათა გამოკვლევა არ მოიცავს იმ შინამეურნეობებსა და საწარმოებს, რომლებიც ეწევიან **მხოლოდ** სასოფლო-სამეურნეო მომსახურებას, მეტყევეობას, ნადირობასა და თევზჭერას.

ინტერვიუერთა ცოდნის ამაღლება და შეფასება:

ახალი ინტერვიუერების შერჩევა ხორციელდება საქსტატის მიერ დადგენილი წესის შესაბამისად. საქსტატის სოფლის მეურნეობისა და გარემოს სტატისტიკის დეპარტამენტის უფლებამოსილმა პირმა რეგულარულად უნდა განახორციელოს დეპარტამენტის ფარგლებში მიმდინარე გამოკვლევის ინტერვიუერთა და კოორდინატორთა ცოდნის შეფასება მათთან უშუალოდ გასაუბრების ან/და ტესტირების ჩატარების გზით. გარდა ამისა, საჭიროების შემთხვევაში, მან უნდა უზრუნველყოს ინტერვიუერთა ტრენინგი.

საველე სამუშაოები:

ახალი შერჩევის ფორმირების შემდეგ ტერიტორიული ორგანოები სოფლის მეურნეობისა და გარემოს სტატისტიკის დეპარტამენტისაგან, გამოკვლევის ინსტრუმენტთან ერთად, იღებენ შერჩეული მეურნეობების სიებს, რომელსაც ტერიტორიული ორგანოები გადაუნაწილებენ კოორდინატორებს. კოორდინატორებმა თავის მხრივ ინტერვიუერებს უნდა გადაუნაწილონ მათ სამოქმედო არეალში შერჩეული სასოფლო მეურნეობები. შედეგად თითოეული ინტერვიუერი მიიღებს მის მიერ გამოსაკითხი მეურნეობების სიას, რომელიც მოიცავს: საიდენტიფიკაციო კოდს; მეურნის სახელსა და გვარს (შინამეურნეობის შემთხვევაში) ან მეურნეობის დასახელებას (საწარმოს შემთხვევაში), მისამართს და ზოგიერთ სხვა ინფორმაციას.

ოჯახური მეურნეობების გამოკითხვის მეთოდი:

- ინტერვიუერის მიერ რესპონდენტის პირისპირ გამოკითხვა ხორციელდება სასოფლო მეურნეობათა გამოკვლევის საწყისი, კვარტალური და დასკვნითი კითხვარების გამოყენებით.

სასოფლო-სამეურნეო საწარმოების გამოკითხვის მეთოდები:

- საწარმოს საკონტაქტო პირი, კოორდინატორის დახმარებით, ავსებს სასოფლო მეურნეობათა გამოკვლევის საწყის, კვარტალურ და დასკვნით ელექტრონულ (ონლაინ) კითხვარებს.
- გამონაკლის შემთხვევებში, როდესაც საკონტაქტო პირი ვერ ახერხებს, ან უარს ამბობს ელექტრონული კითხვარის შევსებაზე, კოორდინატორს შეუძლია გამოიყენოს კითხვარის შევსების შემდეგი მეთოდები:
 - საწარმოს საკონტაქტო პირის პირისპირ გამოკითხვა;
 - სატელეფონო ინტერვიუ (გამონაკლის შემთხვევებში).
- გამონაკლის შემთხვევებში, როდესაც გარკვეული, დასაბუთებული მიზეზების გამო, ვერ ხერხდება რესპონდენტის გამოკითხვა კოორდინატორის მიერ, შესაძლებელია საწარმო გამოსაკითხად გადაეცეს ინტერვიუერს შესაბამისი ბიუროს უფროსის გადაწყვეტილებით და სოფლის მეურნეობისა და გარემოს სტატისტიკის დეპარტამენტის უფროსის თანხმობით.

რესპონდენტი (გამოკითხული პირი). ინტერვიუერი (კოორდინატორი) პირველ რიგში უნდა შეეცადოს, გამოიკითხოს მეურნე (საწარმოს ხელმძღვანელი), თუ ეს ვერ მოხერხდება, შესაძლებელია მისი შინამეურნეობის ინფორმირებული წევრის (საწარმოში სხვა კომპეტენტური პირის) გამოკითხვა.

გამოკვლევის ჩატარების ეტაპები

გამოკვლევის ერთი რაუნდი (საანგარიშო წელი) მოიცავს 5 გამოკითხვას:

საწყისი გამოკითხვა ტარდება საწყისი კითხვარის გამოყენებით საანგარიშო წლის იანვარ-თებერვალში. ამ გამოკითხვისას ხდება შერჩეული მეურნეობების იდენტიფიკაცია და ფიქსირდება შერჩეულ მეურნეობებში საანგარიშო წლის 1 იანვრისათვის არსებული მდგომარეობა.

I, II და III კვარტალების გამოკითხვა ტარდება კვარტალური კითხვარის გამოყენებით საანგარიშო წლის შესაბამისი კვარტალის შემდგომი თვის დასაწყისში. ამ გამოკითხვისას

გროვდება ინფორმაცია შერჩეულ მეურნეობებში საანგარიშო კვარტალის განმავლობაში გაწეული სასოფლო-სამეურნეო საქმიანობის შესახებ.

დასკვნითი გამოკითხვა ტარდება **დასკვნითი კითხვარის** გამოყენებით საანგარიშო წლის მომდევნო წლის იანვარში. ამ გამოკითხვისას გროვდება ინფორმაცია როგორც საანგარიშო წლის IV კვარტალის განმავლობაში გაწეული სასოფლო-სამეურნეო საქმიანობის შესახებ, ისე შემაჯამებელი ინფორმაცია მთელი საანგარიშო წლის (გასული წლის 1 იანვრიდან 31 დეკემბრის ჩათვლით) განმავლობაში გაწეული სასოფლო-სამეურნეო საქმიანობის შესახებ.

ინტერვიუერთა და კოორდინატორთა ფუნქციები, მოვალეობები და ქცევის ზოგადი წესები:

- **კოორდინატორი**

თითოეულ კოორდინატორს თავის სამოქმედო ტერიტორიაზე ევალება:

- ა) სამუშაოს შესრულებისას იხელმძღვანელოს სასოფლო მეურნეობათა გამოკვლევის ინსტრუქციით: „სასოფლო მეურნეობათა გამოკვლევის ინსტრუქცია“;
- ბ) ყოველი გამოკვლევის დაწყების წინ უზრუნველყოს, მის დაქვემდებარებაში მყოფი ინტერვიუერებისათვის, შერჩეული მეურნეობების სიისა და შესაბამისი გამოკვლევის ინსტრუმენტარის გადანაწილება და მიწოდება;
- გ) უზრუნველყოს სავლეს სამუშაოების ჩატარება და ვადების დაცვა. ასევე, საჭიროების შემთხვევაში, მოახდინოს შესასრულებელი სამუშაოების ხელახალი გადანაწილება ინტერვიუერებისათვის და აუცილებლობის შემთხვევაში, უშუალოდ ჩაერთოს სავლეს სამუშაოებში. მოახდინოს შესაბამისი ტერიტორიული ორგანოს ბიუროს უფროსის ინფორმირება მიმდინარე, მათ შორის პრობლემატურ, საკითხებზე;
- დ) ინტერვიუერებისაგან მიიღოს შევსებული კითხვარები და ინფორმაცია არასრული ინტერვიუების შესახებ. განახორციელოს კითხვარების პირველადი ლოგიკური და არითმეტიკული კონტროლი. შეცდომების ან საეჭვო მონაცემების აღმოჩენის შემთხვევაში კითხვარში გააკეთოს შესაბამისი კომენტარი/მითითება და მოახდინოს რეაგირება მონაცემების გადასამოწმებლად (ინტერვიუერთან/რესპონდენტთან კომუნიკაციით, კითხვარის ინტერვიუერთან დაბრუნებით და საჭიროების შემთხვევაში, მეურნეობაში ინტერვიუერის ხელახალი ვიზიტით). საბოლოოდ, კითხვარების სათაო ოფისში გაგზავნამდე კოორდინატორი მაქსიმალურად უნდა დარწმუნდეს კითხვარში არსებული მონაცემების სისწორეში.
- ე) მოახდინოს გადამოწმებული კითხვარების გადაგზავნა;

ვ) საჭიროების შემთხვევაში ჩაუტაროს ტრენინგი ინტერვიუერებს;

ზ) მოახდინოს მის სამოქმედო ტერიტორიაზე გამოსაკითხი სასოფლო-სამეურნეო საწარმოების ინტერვიუება და მონაცემთა კონტროლი.

- **ინტერვიუერი**

ინტერვიუერი ვალდებულია:

- სამუშაოს შესრულებისას იხელმძღვანელოს სასოფლო მეურნეობათა გამოკვლევის ინსტრუქციით: „სასოფლო მეურნეობათა გამოკვლევის ინსტრუქცია“;
- დროულად მიაწოდოს/გადაუგზავნოს კოორდინატორს მის მიერ შევსებული კითხვარები და შესაბამისი ინფორმაცია არასრული ინტერვიუების შესახებ;
- მოახდინოს შესაბამისი რეაგირება მისთვის დავალებულ ყველა მეურნეობაზე;
- მეურნეობაში მისვლისას თავაზიანად წარადგინოს საკუთარი თავი და აუხსნას მისვლის მიზეზი;
- საჭიროების შემთხვევაში რესპონდენტს აუხსნას გამოკვლევაში მისი მონაწილეობის მნიშვნელობა სოფლის მეურნეობისა და ქვეყნის ეკონომიკის განვითარებაში;
- გამოკითხვისას ლოგიკურად გააკონტროლოს რესპონდენტის მიერ მიწოდებული ინფორმაცია და დააზუსტოს თუ მონაცემი მოეჩვენება საეჭვოდ;
- საჭიროების შემთხვევაში კოორდინატორის მითითებით ხელმეორედ ჩაატაროს ინტერვიუ;
- გააკეთოს მკაფიო, გასაგები და ადვილად აღქმადი ჩანაწერები/კომენტარები;
- ყოველი კითხვა დასვას ისე, როგორც კითხვარშია მოცემული;
- დაიცვას კითხვარში გათვალისწინებული არითმეტიკული პირობები;
- გაეცნოს თავისი სამოქმედო არეალის სოფლის მეურნეობის ზოგად ეკონომიკურ პარამეტრებს: საშუალო მოსავლიანობა, საშუალო წველადობა, კვერცხმდებლობა და ა.შ. საჭიროების შემთხვევაში დაეხმაროს რესპოდენტს გაანგარიშებებში.

დაუშვებელია:

- ოჯახური მეურნეობების (შინამეურნეობების) ინტერვიუება რესპონდენტის პირისპირ გამოკითხვის გარეშე (ტელეფონით ან სხვა საშუალებით)*;
- კითხვარის ფალსიფიკაცია*;
- 15 წლამდე ასაკის შინამეურნეობის წევრის გამოკითხვა;

- საკუთარი ინიციატივით რომელიმე მეურნეობაში არ მისვლა და რეაგირების გარეშე დატოვება;
- შერჩეული მეურნეობის თვითნებურად ჩანაცვლება სხვა მეურნეობით.

** პუნქტების დარღვევა იწვევს სამართლებრივ პასუხისმგებლობას.*

რეგიონული ზედამხედველობა:

- საქართველოს სტატისტიკის ეროვნული სამსახურის ტერიტორიული ორგანოების ბიუროს უფროსები.

თავის სამოქმედო ტერიტორიაზე ევალება:

ა) სასოფლო მეურნეობათა გამოკვლევის ფარგლებში ბიუროს საქმიანობის ხელმძღვანელობა, ბიუროზე დაკისრებული ამოცანების შესრულება, თანამშრომელთა შორის ფუნქცია-მოვალეობების დელეგირება და მათზე დაკისრებული მოვალეობების შესრულების კონტროლი;

ბ) გამოკვლევის მოსამზადებელი სამუშაოების უზრუნველყოფა:

➤ საველე პერსონალის შერჩევა, კანდიდატურებისა და მათი პირადი დოკუმენტაციის წარდგენა საქსტატის სოფლის მეურნეობისა და გარემოს სტატისტიკის დეპარტამენტისათვის;

➤ საველე პერსონალისათვის (ინტერვიუერები და კოორდინატორები) ტრენინგის ორგანიზება/ჩატარება;

➤ საქსტატის ცენტრალური ოფისისგან გამოკვლევის შერჩეული მეურნეობების სიისა და ინსტრუმენტარის მიღება და საველე პერსონალისათვის გადანაწილება;

გ) გამოკვლევის საველე სამუშაოების ოპტიმალურად წარმართვის უზრუნველყოფა:

➤ დაქვემდებარებულ ტერიტორიაზე საველე სამუშაოების ჩატარება და ვადების დაცვა;

➤ საველე პერსონალის მიერ შესრულებული სამუშაოების კონტროლი და შესაბამისი რეაგირება;

➤ ცალკეული ინტერვიუერის მიერ შევსებული კითხვარების სრულყოფილად შევსების გადამოწმება და შერჩევითი კონტროლი;

დ) საველე სამუშაოების დასრულების შემდეგ კვლევის შემდგომი პროცესების უზრუნველყოფა:

➤ შტატგარეშე თანამშრომელთა სამუშაოს შესრულების ფინანსურ ანგარიშებზე ხელმოწერა და წარდგენა (დადგენილი ფორმატით);

- საველე სამუშაოების შესახებ ანგარიშის მომზადება და საქსტატის ცენტრალური აპარატის შესაბამისი დარგობრივი დეპარტამენტისათვის წარდგენა;
- ინტერვიუერთა მიერ შევსებული კითხვარების რაოდენობრივი კონტროლი სტატუსების მიხედვით.

კოორდინაცია სოფლის მეურნეობისა და გარემოს სტატისტიკის დეპარტამენტის მიერ.

თითოეულ თანამშრომელს თავის საკურატორო არეალში ევალება:

- ა) კოორდინატორებისათვის და ინტერვიუერებისათვის ტრენინგის ჩატარება;
- ბ) გამოკვლევის ორგანიზება: ინსტრუმენტარის დაკომპლექტება, შევსებული კითხვარების მიღება, კონტროლი და შესაბამისი რეაგირება, ინტერვიუერებისა და კოორდინატორების მუშაობის ზედამხედველობა;
- გ) სასოფლო მეურნეობათა შერჩევით გამოკვლევასთან დაკავშირებული მეთოდოლოგიური და ტექნიკური ცვლილების შესახებ ინფორმაციის მიწოდება თავისი საკურატორო არეალის ტერიტორიული ორგანოს ბიუროს უფროსისათვის.

შესრულებული სამუშაოს წარდგენა სოფლის მეურნეობისა და გარემოს სტატისტიკის დეპარტამენტში:

სოფლის მეურნეობისა და გარემოს სტატისტიკის დეპარტამენტს ტერიტორიული ორგანოებისაგან მიეწოდება საველე სამუშაოებთან დაკავშირებით მომზადებული ანგარიში და შევსებული კითხვარები.

წარმოდგენილი შევსებული კითხვარების მიღებას, აღრიცხვას, ხარისხის ზოგად კონტროლს და საველე სამუშაოებთან დაკავშირებით წარმოდგენილი ანგარიშის განხილვას განახორციელებენ საქსტატის სოფლის მეურნეობისა და გარემოს სტატისტიკის დეპარტამენტის თანამშრომლები.

მონაცემთა გაწმენდა

მონაცემთა ბაზის საბოლოო გაწმენდა და ჰარმონიზაცია ხორციელდება საქსტატის სოფლის მეურნეობისა და გარემოს სტატისტიკის დეპარტამენტის მიერ. სპეციალურად შექმნილი პროგრამა ავლენს იმ კითხვარებს, რომლებშიც ლოგიკური და არითმეტიკული შეუსაბამობებია, აგრეთვე თვით ამ შეუსაბამობებს. გარდა ამისა, მათი გამოვლენა ხორციელდება მექანიკურადაც. დეპარტამენტის თანამშრომლები საველე პერსონალთან და რესპონდენტებთან ტელეფონით გადამოწმების გზით ასწორებენ შეცდომებს. იმ შემთხვევაში,

თუ გადამოწმება ვერ ხერხდება, გასწორება წარმოებს ლოგიკურად, სტატისტიკური მეთოდების გამოყენებით. შედეგად მიიღება მონაცემთა ბაზა, რომელიც თავისუფალია თითოეული კითხვარის შიგნით შეუსაბამობებისაგან. ამის შემდეგ იწყება მონაცემთა ბაზის, როგორც მთლიანის, გაწმენდა. ხდება ამოვარდნილი, არატიპური და საექვო მონაცემების გამოვლენა, მათი გადამოწმება და გასწორება. აგრეთვე ხდება კონკრეტული გამოკითხვის მონაცემების თავსებადობის შემოწმება ამავე რაუნდის სხვა გამოკითხვების მონაცემებთან. ამ მხრივ განსაკუთრებული მნიშვნელობა ენიჭება დასკვნით გამოკითხვას, რომელიც საშუალებას იძლევა გადამოწმდეს და ჰარმონიზაციაში მოვიდეს გამოკითხვების შედეგები.

მონაცემთა დამუშავება და ანალიზი

მონაცემთა ბაზის გაწმენდისა და შეწონვის დასრულების შემდეგ ხდება გამომავალი ცხრილების ფორმირება, რასაც უზრუნველყოფენ საქსტატის სოფლის მეურნეობისა და გარემოს სტატისტიკის დეპარტამენტის თანამშრომლები. მიღებული შედეგების შედარება ხორციელდება წინა კვარტალების და გასული წლის ანალოგიური პერიოდის შესაბამის შედეგებთან. მნიშვნელოვანი გადახრების არსებობის შემთხვევაში ხდება მათი გამომწვევი მიზეზების დადგენა და ანალიზი. მხოლოდ ამის შემდეგ ითვლება მონაცემები გამოსაქვეყნებლად მზად. საბოლოოდ მუშავდება ყოველწლიური პუბლიკაცია, რომელიც ელექტრონული სახით ქვეყნდება საქსტატის ვებგვერდზე დადგენილი წესის შესაბამისად. წინასწარი მონაცემები ქვეყნდება ქვეყნის დონეზე, ხოლო საბოლოო მონაცემები რეგიონულ ჭრილშიც. შერჩევის არასაკმარისი ზომა არ იძლევა საშუალებას მიღებული იქნეს საიმედო მაჩვენებლები ყველა რეგიონისათვის. აღნიშნული რეგიონებისათვის შესაბამისი მაჩვენებლები ქვეყნდება აგრეგირებული სახით.

ღონისძიებები გამოუპასუხებლობასთან დაკავშირებით:

გამოუპასუხებლობის შემთხვევაში (სტატუსები: “რესპონდენტი ვერ მოიძებნა”, “ინფორმაციის მოცემაზე უარი განაცხადა”), შესაბამისი ბიუროს უფროსმა უშუალოდ უნდა გადაამოწმოს ცალკეული შემთხვევები და პირადად გაატაროს სათანადო ღონისძიებები გამოუპასუხებლობის შემცირების მიზნით, რომლის შემდეგაც უნდა წარმოადგინოს ახსნა-განმარტებები ცალკეულ გამოუპასუხებელ ინტერვიუსთან დაკავშირებით. ასევე, უნდა გადამოწმდეს ის შემთხვევები, როდესაც მეურნეობა არ/ადარ არსებობს ან სტატუსი გაურკვეველია, რათა თავიდან იქნეს აცილებული სტატუსის შეცდომით მინიჭება.